

**SOALAN NO: 175**

**PEMBERITAHUAN PERTANYAAN DEWAN RAKYAT**

**PERTANYAAN : BUKAN LISAN**

**DARIPADA : YB DATUK SAPAWI BIN AHMAD WASALI  
[ SIPITANG ]**

**SOALAN :**

**Datuk Sapawi bin Ahmad Wasali [ Sipitang ]** minta **PERDANA MENTERI** menyatakan apakah langkah diambil bagi mempertingkatkan keberkesanan operasi Agensi Penguatkuasaan Maritim Malaysia (APMM) terutama daripada segi pemilikan aset dan keanggotaan, berikutan penugasan di perairan negara semakin mencabar.

**JAWAPAN: YB DATO' SERI DR. SHAHIDAN BIN KASSIM**  
**MENTERI DI JABATAN PERDANA MENTERI**

Tuan Yang di-Pertua,

APMM merupakan agensi tunggal penguatkuasaan maritim yang menjalankan pemantauan di perairan negara sepanjang masa. APMM sentiasa melaksanakan tugas dan tanggungjawab yang telah diamanahkan dengan penuh dedikasi. Prestasi APMM menunjukkan peningkatan yang positif dan sejak penubuhannya pada 2006, kadar aktiviti pelanunan di Selat Melaka telah dapat dikurangkan. Pencapaian ini telah memperlihatkan kesungguhan dan keberkesanan peranan yang dilaksanakan oleh APMM.

Antara langkah-langkah yang diambil bagi mempertingkatkan keberkesanan operasi, APMM telah merangka Pelan Perancangan Strategik Maritim Malaysia 2040 bagi menentukan hala tuju APMM dalam mencapai kecemerlangan organisasi di samping merealisasikan visi yang ditetapkan. Pelan ini dijadikan landasan dan panduan bagi melaksanakan pembangunan aset dan keupayaan APMM dari 2014 hingga tahun 2040 yang meliputi rancangan pembangunan Malaysia dari RMK-9 sehingga RMK-15. Pelaksanaan pembangunan ini akan dilakukan secara berfasa sesuai dengan keperluan semasa dan kemampuan kewangan negara yang terdiri dari pelan jangka pendek dan pelan jangka panjang.

Pelan Jangka Pendek memberi keutamaan kepada perolehan aset, pengambilan dan pembangunan sumber manusia yang diperlukan bagi menyokong tugas dan tanggungjawab. Pelan Jangka Panjang pula meliputi perolehan dan penggantian aset bagi mengekalkan dan melengkapkan kekuatan dan kesiapsiagaan APMM.

APMM akan ditambahbaik dengan penambahan perjawatan dan sumber manusia, aset udara, aset laut, UAV, sistem pengawasan, sistem pemerintahan, kawalan dan perisikan yang dapat memastikan tugas dan tanggungjawab dilaksanakan dengan berkesan. Peningkatan kemampuan agensi ini terus dilaksanakan dengan kerjasama pakar-pakar dari negara luar seperti USA, Jepun, Australia, Canada dan juga tidak ketinggalan kerjasama yang padu dari dalam negara termasuk institusi pengajian tinggi tempatan.

Bagi Akademi Maritim Sultan Ahmad Shah (AMSAS), APMM bukan sekadar memberi latihan kepada pelatih dari dalam negara malah juga telah melatih pelatih dari Benua Afrika.

APMM telah mendapat beberapa pengiktirafan dari dalam dan luar negara seperti *Maritime Security Agency of The Year* pada 2009 daripada *Frost & Sullivan* di Singapura, *International Quality Summit Award in The Gold Category* di New York pada 28 Mei 2012 dan Anugerah Perkasa Maritim 2014 dari Kementerian Pengangkutan.

Sekian. Terima kasih.

**PEMBERITAHUAN PERTANYAAN  
DEWAN RAKYAT, MALAYSIA**

**PERTANYAAN : BERTULIS**

**DARIPADA : Y.B. DATUK SAPAWI BIN AHMAD WASALI  
[ SIPITANG ]**

**SOALAN :-**

**Y.B. DATUK SAPAWI BIN AHMAD WASALI [ SIPITANG ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah inovasi 'upcycle' yang diperkenal Solid Waste Corporation (SWCorp) dijadikan fokus kitar semula oleh Kementerian bagi menghasilkan produk yang mempunyai nilai lebih tinggi daripada bahan kitar semula

## JAWAPAN :-

Tuan Yang di-Pertua,

Untuk makluman Ahli Yang Berhormat, inovasi *upcycle* ini merupakan aspirasi baharu negara dalam memastikan pengurusan sisa pepejal yang mampan dan seterusnya memelihara sumber yang semakin terhad. Pelaksanaan inisiatif baharu negara ini adalah di peringkat permulaan dan memerlukan kajian serta penyelidikan yang lebih terperinci.

Pelaksanaan inovasi *upcycle* ini akan meningkatkan tahap industri dalam pengeluaran produk yang lebih bernilai dan mempunyai nilai tambah yang lebih tinggi berbanding pengeluaran produk kitar semula yang sedia ada.

Oleh itu, Perbadanan Pengurusan Sisa Pepejal dan Pembersihan Awam (SWCorp) akan mengadakan perbincangan secara terperinci dalam aspek penyelidikan dengan beberapa Institut Pengajian Tinggi Awam (IPTA) yang telah menandatangani MOU bersama pihak SWCorp untuk mengenal pasti kaedah pelaksanaannya di negara.

Menjalinkan kerjasama strategik dengan pelbagai pihak dalam penyediaan kemahiran untuk melatih pengusaha *upcycle* termasuk Yayasan Inovasi Malaysai (YIM), pihak industri dan Usahawan Kecil dan Sederhana (SME), Badan Bukan Kerajaan (NGO), persatuan atau yang telah lama berkecimpung dalam bidang *upcycling* ini seperti Biji Biji Design Initiative, Handy Craft dan sebagainya.

Menjalinkan kerjasama dengan institut penyelidikan tempatan dalam menjalankan penyelidikan yang berkaitan dengan *upcycle*. Contohnya, menjalankan kajian mengenai kaedah untuk mendapatkan sumber yang berharga dari sisa seperti sisa plastik kepada diesel dengan kos yang minima dan mesra alam.

Kementerian Kesejahteraan Bandar,  
Perumahan dan Kerajaan Tempatan

April 2015

**JAWAPAN SOALAN PERSIDANGAN DEWAN RAKYAT**

**PERTANYAAN BERTULIS : DATUK RAIME BIN UNGGI [TENOM]  
DARIPADA**

**JAWAPAN OLEH Y.B. MENTERI PENDIDIKAN MALAYSIA**

**PERTANYAAN BERTULIS**

**Datuk Raime bin Unggi [ Tenom ]** minta **MENTERI PENDIDIKAN** menyatakan langkah strategik dalam membendung ideologi yang terpesong seperti kumpulan ajaran sesat, kumpulan militan ketenteraan dan penganas serta politik ekstrem yang boleh menular dalam kalangan mahasiswa di Institusi Pengajian Tinggi Awam (IPTA).

**JAWAPAN**

Untuk makluman Ahli Yang Berhormat,

Kementerian Pendidikan Malaysia (KPM) bekerjasama dengan Jabatan Agama Islam Persekutuan untuk membanteras penyebaran fahaman ideologi yang dilaksanakan secara bersepadu dan dianggotai oleh Jabatan Agama Islam Negeri dan Polis Diraja Malaysia daripada terus menular dan mempengaruhi mahasiswa di institusi pendidikan tinggi awam (IPTA).

KPM juga sentiasa mengambil berat dalam pemupukan semangat patriotisme, jati diri dan nasionalisme di kalangan mahasiswa IPTA melalui pelbagai aktiviti yang dilaksanakan oleh badan beruniform seperti:

- (a) Kor Sukarelawan Siswa Siswi Polis (SUKSIS);
- (b) Kor Sukarelawan Siswa Siswi Pertahanan Awam (SISPA);
- (c) Pegawai Latihan Pasukan Simpanan (PALAPES); dan
- (d) Kumpulan Latihan Kelana Siswa Malaysia (KLKM).

Di samping itu, mahasiswa bukan dari kalangan badan beruniform juga terlibat dalam aktiviti patriotisme yang dikendalikan oleh pihak IPTA. Mahasiswa yang mengambil bahagian dalam University Community Engagement (UCE) juga terlibat dengan aktiviti yang memberikan impak kepada patriotisme dan jati diri.

Pusat Islam di IPTA turut memainkan peranan penting dengan mengadakan pelbagai program bagi meningkatkan kefahaman dan akidah pelajar Islam, di antaranya ialah Seminar Ahli Sunnah Waljamaah, Eksplorasi Ilmu, Falak Syari'e, Program Tarbiah Hati, Pengajian Al-Quran dan banyak lagi bagi memberi ruang kepada penghayatan Islam yang lebih mendalam.